



Elkarri-ren Adi Fundazioaren proiektuak finantzatzeko erabiliko dute 'Ikusi Makusi' loteria.

SIMAL

Elkarri-ri loteriaren ustiaketa eman izana gaitzetsi dute PSE-EEK eta PPk

Ebazpena erabat teknikoa izan dela dio Jonan Fernandezek

PSE-EEK eta PPk ez dute begi onez ikusi Herrizaingo Sailak Elkarri-ri EAEn bat-bateko loteriaren ustiaketa eman izana. Guillermo Etxenikeren ustez EAJk saritu nahi izan du Bilbon izandako Bake Konferentzia «autodeterminazioari buruzko eztabaida bilakatu izana». Carmelo Barrio PPko parlamentariak «gizarte eskandalutzat» jo du erabaki hau.

INAKI URIARTE / BILBO

PSE-EEK eta PPk azalpenak eskatuko dizkiote Herrizaingo Sailari EAEn bat-bateko loteriaren ustiaketa Elkarri-ren eskaintzari eman izanagatik. Bi alderdi hauen iritziz ezinduen elkarteak jaso beharko zukeen Eusko Jaurlaritzaren baimena eta ez orain jaso duenak.

«Eusko Jaurlaritzako Joko Zuzendaritzak Elkarri iragan egunetan egindako konferentzia autodeterminazioari buruzko eztabaida bilakatu izanagatik saritu du» adierazi zuen Guillermo Etxenik. PSE-EEKo Gipuzkoako idazkariorde nagusiaren iritziz bakea jarrera eta hausnarketaren kontua da, Elkarri-ri ekonomi bitartekoak eman izanak, oster, «biolentzia geldiarazteko ezinbestean aurreargiak eta publizitate ugari izango dituzten bilerak egitea ekarriko du, hots ikuskizun propagandistikoa bilakatzea».

PSE-EEKo burukide honen aburuz «armak dituztenei eta botoekin babesten dituztenei bakea eskatzeak ez du diru gas-

turik ez loteriarik eskatzen, hiltzeari utzi eta biolentzia alde batera lagatzea baizik». Bere ustez, «gizarte eskandalua» ez da sortzen lege kanpoko jokabideengatik soilik, «baita hartzen diren erabakien etikagatik ere».

Ramon Jauregik ez zuen deklarazio luzerik egin nahi izan, «harritu egin nau eta ez dut gogoko izan» baino ez zuen esan. Rodolfo Ares parlamentariaren iritziz, erabaki honek lehiaketara aurkeztu ez diren mugimendu bakezaleekiko bereizkeria sortzen du, «ziurrenik uste izan dutelako oinarrien helburuak ez zirela elkarte baten ekitaldiak finantzatzeko».

Carmelo Barriok «estetikaren aldetik deitoragarritzat» jo zuen erabakia. «Teknikoki zuzena izan arren, eta elkarte jakin batzuen finantzabidea, zentzuz aztertuta erabaki deitoragarria da, Eusko Jaurlaritzak Bakearen Aldeko Koordinakundeari, Bakea Oraini edo Denon Arteani be-

raien ekinbide nagusiarekin bat ez datorren ekinbide bat eman izan balio bezala». Antzeko hitzekin mintzatu zen Jaime Mayor Oreja ere Donostian. PPk baimen hori aztertu egingo du sailburuari dagozkion azalpenak eskatzeko.

IRIZPIDE POLITIKORIK GABE

Jonan Fernandezek ukatu egin zuen erabakia irizpide politikotan oinarritu dela. «Holako ebazpen batean irizpide politikoak erabiliko balira, denok kontra jarriko ginateke, holako kontzesio batean aukeraketak teknikoa izan beharko du, baldintzen arabera ikusi zein egokitzen den hobeto baldintza teknikoei. PP eta PSOEek planteatzen dute guri ez digutela kontzesiorik eman behar irizpide politikoengatik, eta hori aberrazio bat da eta ezin daitekè onartu». Elkarri-ko koordinatzailearen ustez erabakia «erabat teknikoa» izan da.

‘Ikusi Makusi’

BILBO

■ Elkarri-k aurkeztutako eskaintzak, ‘Ikusi Makusi’ izenekoak, lortu zuen Jaurlaritzatik bost urterako baimena loteria arina ustiatzeko. Lehiaketara bi talde aurkeztu ziren, irabazlea eta Ezinduen Euskal Kolektiboa.

Txartelean datorren sari ezkutua lortzeko erosleak txartela haraskatu behar du azpian saria egokitu zaion jakiteko. ‘Harraskatu eta irabazi’ izenaz ezagutzen den jokoa alegia. Txartela

ehun pezetan (lau libera) salduko da taberna, denda eta supermerkatuetan. Salbuespen bakarra erakunde publikoen bulegoak eta ikastetxeak dira.

Adi fundazioak Tolosan izango du egoitza nagusia eta beste hiru bulego Gipuzkoa, Araba eta Bizkaian. Zuzenean 25 pertsonari emango die lana. Elkarri-k hiru hilabeteko epea du jokoa martxan jartzeko. Lehen momentuan 1.222 saltoki izango ditu, nahiz eta aurrerantzean 2.400era iristeko asmoa izan.


Vera, Justo eta Barrionuevoren defentsa PSOE ordaintzen ari da

MADRIL

Rafael Vera, Juan de Justo eta Jose Barrionuevoren defentsako abokatuak PSOE ordaintzen ari da, ‘El Pais’ egunkariak atzo argitaratu ondoren Francisco Fernandez Marugan PSOEko finantza idazkariak baieztatu zuenez. Rafael Vera eta bere idazkari ohia, Juan de Justo, kartzelan daude ‘GAL auziarekin’ zerkusia izan zutelakoan. Dagoeneko, hamar milioi pezeta (400.000 libera inguru) ordaindu dizkie PSOEk hiruren abokatuei.

Ordainketa hauek berak baimendu zituela aitortu zuen Fernandez Maruganek, eta «jardura politikoaren kontzeptzio fraternal eta solidario» batetik abiatuz egin zuela esan zuen. Horrez gain, De Justok, Verak eta Barrionuevok abokatuei ordaintzeko dirurik ez dutela eta, «defentsako eskubiderik gabe ez uztearren» beren defentsa PSOEek ordaintzea erabaki zuela azaldu zuen Maruganek. «Bere garaian jardura politiko batzuk beren gain hartu zuten kide hauei babes eman behar diegu, batez ere kasu honetan bezala, beharrezko baliabiderik ez dutela, bestela defentsako eskubiderik gabe-utziko genuke», esan zuen.

PSOEko finantza ardura-dunak Alfonso Guerra alderdiko idazkariorde nagusiarekin kontsultatu zuen erabakia,



Rafael Vera.

SIMAL

baina ez ordea Felipe Gonzalez idazkari nagusiarekin ezta Cipria Ciscar antolakuntza idazkariarekin ere. Hala ere, Fernandez Marugan ziur agertu zen zuzendaritza osoak erabakia onartu eta babestu egingo duela. Buruzagi sozialistak azaldu zuenez, PSOEren aurrekontuetan 60 milioi pezetako partida dago gastu juridikoetarako eta finantza arduradunak erabakitzen du zertan gastatu.

Jose Barrionuevo Barne ministro ohiak «normal» iritzizion «kargu publiko gisa egindakoarengatik zenbait akusaziori aurre egin behar dieten militanteen defentsa alderdiak bere gain hartzeari». «Arraroa» ez ordaintzea izango litzatekeela gaineratu zuen.

Serrak ukatu egin du Amedori egin ordainketen berri zuela

MADRIL

Narcis Serra Espainiako Gobernuako presidenteordeak esan duenez, «gezurrak» dira Luis Roldan Goardia Zibileko zuzendari nagusi ohiak egin berri dituen akusazioak. Serrak eta Jose Luis Corcuera Barne ministro ohiak Jose Amedoren emazteari Suitzan egindako diru ordainketen berri bazutela adierazi zuen Roldanek epailearen aurrean.

«Ezin dugu prozesu judicial baten barruan dagoen pertsona batek egiten dituen adierazpenen atzetik ibili», esan zuen atzo Serrak Madrilgo Kongresuko pasiloetan. «Roldanek zer den egia eta zer gezurra esan behar du, baina niri buruz esandakoa gezurra da», gaineratu zuen.

PSOE Rafael Veraren eta Juan de Justoren —biak dau-

de espetxeratuta ustez GALekin izan zuten loturagatik— abokatuak ordaindu al dituen galdetu ziotenean, ez dituela gai horren zehaztasunak ezagutzen erantzun zuen Serrak, baina bere ustez normala da «alderdiak bere kideak babestea».

Joxean Lasaren eta Joxi Zabalaen gorpuen agertzea dela eta, Felipe Gonzalez presidentearen adierazpenekin bat egin zuen Serrak. Jose Barrionuevo orduan Barne ministro zenak dimititzeko egin diren eskaerei buruz, berriz, Serrak esan zuen PSOEko kideek beharrezko ikusi duten kasuetan beren gain hartu dituztela erantzukizunak. PPri, bestalde, leporatu egin zion egiten duen oposizioa Gobernuko partaideen dimisioak eskatzea baino ez dela.